



# **PARTORDING NI ACARA PARMINGGUON MINGGU VIII DUNG TRINITATIS**

**HKBP TAMAN WISMA ASRI  
BEKASI UTARA**

**Ev. 1 Musa 28 : 10 - 22      Ep: 2 Korint 13 : 5 - 13**

**TOPIK:  
“PANDONGANION DOHOT PANGARAMOTION  
NI DEBATA”  
(ALLAH YANG MENYERTAI DAN MELINDUNGI)**



**HURIA KRISTEN BATAK PROTESTAN  
Minggu, 30 Juli 2023**

**00. JOUJOU TU PARMINGGUON:**

**U** : Huria na hinaholongan ni Tuhan Jesus Kristus, selamat hari minggu ma di hita saluhutna!

**H** : **Selamat hari minggu ma tutu di hita angka nahinaholongan ni Tuhan Jesus!**

**U** : Dibagasan unduk dohot serep ni roha, jomolo ma hita martangiang na hohom dipamuhai ni parminguonta on,!

**H** : **(Martangiang na Hohom...diiringi musik satonga soara)**

**U** : Amen. Goar ni minggu-ta sadarion ima **MINGGU PAUALUHON DUNG TRINITATIS** dohot topik **“PANDONGANION DOHOT PANGARAMOTION NI DEBATA”**. Antong, tapuji ma Tuhanta, marende ma hita!

**01. Marende BE. No.125 : 1 - 2 “MARLASNIROHA HITA ON”**

1. Marlasniroha hita on mamuji Debata  
Ai asi ni rohaNa i do bongot tu rohanta i  
Umbaen nuaeng mardomu i dison sadari on, dison sadari on

..... *(Jongjong)*

2. Dibaheni manggogo be ma hita on sude  
Mamuji Tuhan Jesus i parasiroha godang i  
Sibaen las ni rohanta i, nuaeng nang sogot pe, nuaeng nang sogot pe

**02. VOTUM – INTROITUS – TANGIANG: A.XV.A.18 / D.XIII.45**

**U** : Marhitehite Goar ni Debata Ama dohot Goar ni AnakNa, Tuhan Jesus Kristus, dohot Goar ni Tondi Parbadia, na tumompa langit dohot tano on. Amen. Pos situtu do rohangku, manang hamatean, manang hangoluan, manang angka surusuruan ni Debata, manang harajaon, manang hagagoon, manang angka na masa nuaeng, manang angka na ro sogot, ndang tarbahren i manirangi hita sian haholongan ni roha ni Debata, na marhitehite Kristus Jesus Tuhanta i. **Haleluya!**

**H** : **(Mangendehon: Haleluya, Haleluya, Haleluya!).**

**U** : **Martangiang ma hita:**

Ale Tuhan Debata, Parasiroha jala na bonar ! Mauliate hudok hami, ala dipabinsar Ho tu hami Barita na Uli, na manondangi rohanami. Ai ala ni i umbahen hutanda hami Ho dohot lomo ni rohaM. Dipangido rohanami naeng mangulahon lomo ni rohaM hami saleleng di ngolu on, jala naeng martua hami bahenonMu. Sai parbadiai ma rohanami marhitehite TondiM, jala pargogoi ma hami mangorom hisaphisap dohot manggotaphon roha portibi on. Sai palas ma rohanami mangoloi Ho ala ni AnakMu, Tuhan Jesus Kristus, Tuhannami. Amen.

..... *(hundul)*

**03. Marende BE. No.575 : 1 “PUJI MA DEBATA NA SONGKAL”**

1. Puji ma Debata na songkal, pasangap ma goarNa  
Puji ma angka rura dohot lung, angka dolok na timbo  
Dohot hasak ni galumbang sude mamuji Ho.  
Langit i na mansai hembang bintang i  
Na mansai torang ombun i na mansai saksak  
Pasangaphon Ho o Debata  
Tung so olo tading au, lao mamuji Ho Tuhan  
Nasa gogo bahenonku, lao pasangaphon Ho  
Ro di ujungni ngolungku, sai pujionku Ho

**04. PATIK:**

- U : Tangihon hamu ma Patik ni Debata di Minggu-ta sadari on, i ma nanienet sian  
**Josua 24 : 23:** On pe paholang hamu ma debata sileban, angka na di  
tongatongamuna i, jala paunduk hamu rohamuna tu Jahowa, Debata ni Israel.  
**Ido sahatna, Antong rap mangido gogo ma hita sian Tuhan Debata !**  
S : Ale Tuhan Debata, sai pargogoi ma hami mangulahon na hombar tu  
PatikMi. Amen.

**05. Marende BE.No.683 : 2 - 3 “DI ADOPANMU JESUS”**

2. Di adopanMu Jesus, marsomba au huhut tungki,  
Lao manopoti dosangki, di adopanMu Jesus.  
*. . . . . (Jongjong)*
3. Di adopanMu Jesus, tarsolsol bagi rohangkon,  
Muba ma au tu jolo on, di adopanMu Jesus.

**06. MANOPOTI DOSA : B.8 – C.10**

- U : Huria ni Tuhanta, tatopoti ma dosanta na godang i tu adopan ni Debata,  
**martangiang ma hita:**  
Ale Tuhan Debata, Amanami, Parasiroha na sumurung ! Na pungu do hami di  
joloM martangiang tu Ho; ndada mangasahon hatigorannami, na  
mangasahon asi ni rohaM na godang i do. Sai asi ma rohaM mida sandok  
bangsonami, sesa ma dosanami saluhutna. Sai sungguli ma rohanami, asa  
muba roha dohot pangalahonami, ala ni Tuhan Jesus Kristus Tuhannami,  
Sipangolu hami. Amen

*Tingki na hohom manghuling musik satonga suara*

**Bagabaga ni Debata taringot tu hasesaan ni dosanta:**

Songon on do Hata ni Jahowa: Unang ho mabiar, ai Ahu do Siluluhon ho;  
nunga pola hujou goarmu, Ahu nampuna ho.

**Hasangapon ma di Debata na di ginjang !**

- S : Amen .....(hundul).

**07. Marende BE. No. 190 : 1 - 2 “LAS ROHANGKU SITUTU”**

1. Las rohangku situtu, mida Jesus na lulu,  
Manjalahi hajolmaon, ai lbana paluahon,  
Jolma manisia i, sian hamagoan i
2. Las rohangku situtu, mida Jesus na burju  
Patupahon hangoluan, di au na di hamagoan  
Tung saluhut dosangki, do disesa Jesus i.

**08. E P I S T E L : (RESPONSORIA)**

**U : Tabege ma Hata ni Debata turpuk Epistel di ari Minggu sadari on, ima na tarsurat di 2 Korint 13 : 5 – 13 Tajaha ma marsorinsorin:** Unjuni hamu ma dirimuna, manang na di bagasan haporseaon hamu; sulingkit hamu ma dirimuna! Na so ditanda hamu do dirimuna, paboa naung Jesus Kristus di bagasan hamu? Ai ia so i, sandok na so tau do hamu!

**H :** Alai dihirim rohangku, tandaonmuna do, ndang na so tau hami.

**U :** Alai martangiang do hami tu Debata, asa unang diula hamu agia aha na roa; ndada asa hami idaon na tau, naeng hamu mangulahon na denggan, dipangido rohanami, nang pe songon na so tau hami idaon.

**H :** Ai ndang adong gogonami mangalo hasintongan i, sandok mangkongkop hasintongan, i do.

**U :** Ai las do rohanami, hamu margogo, nang pe gale hami. Laos on do tangiangnami: Naeng gabe togu rohamuna!

**H :** Dibahen i husurat songon i, di na holang dope ahu, asa unang posi pambahenku, dung ro ahu, marguru tu huaso, na nilehon ni Tuhan i tu ahu, laho pauliulihon, ndada manegai.

**U :** Onpe, ale angka dongan, sai las ma rohamuna, sai olo ma hamu patoguon jala apoan, sada ma pingkiranmuna; radoti hamu ma dame i, asa didongani Debata, Parholongroha jala Pardame i, hamu!

**H :** Masitabian ma hamu marhitehite umma na badia. Na manongos tabi tu hamu saluhut angka na badia i.

**U :** Sai didongani asi ni roha ni Tuhan Jesus Kristus dohot holong ni roha ni Debata dohot parsaoan ni Tondi Parbadia ma hamu saluhutna!

**S : Amen.**

**09. KOOR .....**

**10. Marende BE. No.267 : 1 + 6 “O TUHAN SULINGKIT”**

1. O Tuhan sulingkit ma au, sondangi rohangku tangkas. Gogongku soada di au  
Tu Ho au paringgas, tu Ho au padonok, di Ho nama au 2x

*. ....(jongjong)*

6. Tu Ho, o Tuhanku, au lao dung suda bohalhu dison. Pargogo, parbasa do Ho  
Ramoti, dongani, urupi ma hami, sai togu au on 2x

## 11. MANGHATINDANGHON HAPORSEASON:

**U** : Tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok:

**R** : Ahu porsea di Debata Jahowa, i do Ama, Pargogo na so hatudosan na tumompa langit dohot tano.

Ahu porsea di Jesus Kristus, Anak ni Debata Jahowa, na sasada i; i ma na tinubuhon ni si Maria na gabegabeaon sian Tondi Parbadia andorang so habubuhan; i do Tuhanta, na tumaon na bernit di panguhuman ni si Latus; na mate tarpajal do Ibana di hau pinarsilang, na tuat tu banua toru, dung ditanom, na mulak mangolu di ari patolubon, na manaek tu surgo laho hundul tu siamun ni Debata Jahowa, AmaNa i, Pargogo na so hatudosan i, disi ma Ibana, paima mulak sogot tu tano on manguhumi halak na mangolu dohot na mate.

Ahu porsea di Tondi Parbadia, jala adong sada huria na badia, Huria hatopan ni halak Kristen angka na badia, dohot di hasesaan ni dosa, dohot di Hata i, na mandok: Mulak mangolu sogot daging ni halak naung mate, dohot di hangoluan na so ra suda.

**Amen.** .....(hundul)

## 12. TINGTING + TANGIANG PANGONDIANON

### 13. Marende BE. No.214 : 1 ---- “SONANG DI LAMBUNG JESUS”

(*Pelean: Ia & Ib Huria*)

1. Sonang di lambung Jesus, sonang na ro tusi  
Unang be ho mabiar, lao mandapothon i  
Tongtong dijouhon Jesus, sai ro ma ho tu Au  
Tadingkon haholomon, jala haposi Au  
Sonang di lambung Jesus, sonang na ro tusi  
Unang be ho mabiar, Lao mandapothon i

2. Sonang di lambung Jesus, rap hita lao tusi  
Ingan na ummul, do di lambungNa i  
Ai nunga diparade hasonanganta i  
Asa marhasonangan Na ro tu Jesus i  
Sonang di lambung Jesus, rap hita lao tusi  
Ingan na ummul, do di lambungNa i

---- Musik ----

3. Jesus haholonganku, Jesus haposanki  
Saleleng au mangolu, dohot di tingkingi  
Ndang be huhabiari, angka pangago i  
Ai diramoti Jesus, au hinophopNa i.  
Jesus haholonganku Jesus haposanki  
Saleleng au mangolu, dohot di tingkingi

**14. JAMITA : 1 Musa 28 : 10 - 22**

28:10 Alai borhat do anggo si Jakkob sian Berseba laho tu Haran.

28:11 Jadi tolhas ma ibana tu sada parbornginan, gabe marborngin ibana disi, ai nunga mate mata ni ari. Dung i dipambuat ma angka batu na disini bahen halang ni uluna, laos modom ibana disi.

28:12 Dung i marnipi ma ibana, diida ma sada tangga, na pinagohon tu tano, tolhas ro di langit ia ujungna, jadi ida ma, sai marnaek mijur sian i angka surusuruan ni Debata.

28:13 Jongjong di ginjangna anggo Jahowa, jala ninna do: Ahu do Jahowa, Debata ni ompum si Abraham dohot Debata ni si Isak, ia tano pinodomanmon lehononku ma tu ho dohot tu pinomparmu.

28:14 Jala sobokkon orbuk ni tano on sogot torop ni pinomparmu, jala angka rarar ma hamu tu hasundutan dohot tu habinsaran dohot tu utara dohot tu dangsina, jala dapotan pasupasu sogot nasa marga na di tano on marhitehite ho do pinomparmi.

28:15 Ida ma, sai dongananku jala ramotanku do ho manang tu dia pe ho mangalangka, jala togihononku do ho mulak tu tano on; ai ndang tadingkononku ho, nda jolo sahat hubahen na huparbaga i tu ho.

28:16 Dung i tarsunggul ma si Jakkob sian na modom i, jadi didok ma: Inangan ni Jahowa do on hape, so pamotoanku.

28:17 Jadi mabiar ma ibana, ninna ma: Na songkal situtu do inganan on, ndang tarbahen so on bagas ni Debata, jala baba pintu ni langit.

28:18 Dung i hehe ma si Jakkob sogot manogotna i, dibuat ma batu pinarhalanguluna i, jala dipajongjong bahen partinandaan, jala diusehon miak tu ginjangna.

28:19 Dung i dibahen ma goar ni inganan i Betel (bagas ni Debata), Lus do goar ni huta i anggo na sai laon.

28:20 Dung i marbagabaga ma si Jakkob, ninna do: Molo didongani jala diramoti Debata ahu di dalan na hudalani on, jala dilehon di ahu sagusagu sipanganon dohot ulos siporuloshononhon.

21 Jala marsonangsonang ahu mulak ditogihon tu bagas ni damang, sai Jahowa ma Debatanku.

22 Jala batu na hupajongjong on bahen partinandaan, i ma gabe bagas ni Debata, jala sude na nilehonmu tu ahu parsampuluonku ma i tu Ho.

**15. Marende BE. No.501 : 1 ---- “SAI DITOGUTOGU JESUS”**

*(Pelean: II)*

1. Sai ditogutogu Jesus tondingki na gale i,  
Asa unang be au ganggu dipanoguonNa i, maradian do rohangku,  
Molo huhaposi i, nang sitaonon dipasonggop sai jonok do Tuhanki.  
Nang sitaonon dipasonggop, sai jonok do Tuhanki.

2. Sai diiringiring Jesus, au na gale situtu.  
Ditungkoli do langkangku, diparmudu au burju.  
Molo loja au mardalan, nang maheu tondingki  
;,: LehononNa aek na tio sian batu mamak i,:

---- Musik ----

3. Sai ditogutogu Jesus au di parhorsihan i.  
Paima sahat au tu surgo, i ma ingananNa i  
Jala idaonku sogot panoguNa i di au.  
;,: Pujionku haholongan ni Tuhanta i di au,:

16. **TANGIANG PANGUJUNGI** ..... (*jongjong*)

- Tangiang Pelean
- Tangiang Ale Amanami
- Pasu Pasu
- Amen, Amen, Amen.



**Selamat Hari Minggu**  
**Salam Sehat Selalu**